

RBC a regala muchanan di Colegio San Hose buki bilingual

ORANJESTAD— Anualmente, RBC Royal Bank a contribui na e “Kinderboekenweek” organisa pa Biblioteca Nacional di Aruba. A cambio di esaki RBC ta ricibi diferente bukinan di mucha, di cual e banco ta haci un donacion na un scol. E aña aki 40 mucha di 5de klas di Colegio San Hose a ricibi e bukinan di RBC su Country Manager Sr. Pierre Rafini.



E buki cu a wordo regala na e studiantenan ta titula “Superwela den coma / Superoma in coma,” skirbi pa Fred Diks den Papiamentu y Hulandes, y esaki ta ilustra dor di Rudyomar Leysner. Colegio San Hose ta e prome scol basico na Aruba cu un curriculum multilingual y e scol a caba di haya un biblioteca nobo. Esakinan te motibonan principal pakico RBC a scoge e scol aki pa haci donacion e aña aki.

Sr. Rafini a bisa: “Nos ta honra y contento di por haci donacion di e bukinan aki na e scol. Cu e contribucion aki nos ta duna nificacion na RBC su compromiso pa yuda comunidadnan prospera. Nos ta spera cu e muchanan haci bon uzo di nan, paso lesamento ta forma un parti hopi importante di nos educacion y desaroyo di nos futuro generacion. Mas nos lesa, mas sabi nos ta bira.”

Durante e evento e muchanan a expresa nan entusiasmo y a demostra nan capacidad di por domina diferente lenguahe. Nan a bisa cu e buki bilingual aki lo yuda nan mehora nan Hulandes, paso nan por busca e palabra cu nan no ta comprende den Papiamentu. Varios mucha a lesa algun storia cortico cu nan mes a skirbi na Ingles.

Nan juffrouw Annelies a comenta: “Danki na e sistema nobo aki di educacion, nos muchanan ta hopi mas expresivo y tin un miho comprendemento di otro lenguahenan manera Hulandes y Ingles. Nan tambe gusta lesa y skirbi hopi mas compara cu mi studiantenan di algun aña pasa. E buki aki ta yuda nos masha hopi mes paso e ta skirbi den dos idioma pues e muchanan por comprende tur cos miho.”